

四庫全書

集部

欽定四庫全書

玩齋集卷三

元 貢師泰 撰

五言律詩

冬至

子月先三正初陽動六虛氣從溫室候雲向曉臺書自
許心猶壯誰嗤髮已疎乾坤萬里客何計樂樵漁

太平三山值風

天塹東南地長江日夜流大風吹水立驟雨挾山浮浩

蕩掀黃鵠歌傾舞白鷗莫憐舟似葉此亦壯哉遊

蕪湖

昨日何處別今朝此地留青山逼岸起白水滿江流雨
隱巡鹽鼓風腥掛網舟何時歌款乃同買綠簑遊

遊麻姑萬松菴

秋日訪招提雲深處處迷殿門松影直庭檻藥苗齊接
竹通流水編籬護野畦道人偏愛客留得樹頭梨

又

積雨變秋思清游愜道心過橋分履迹問寺逐鐘音紅
墮鳥爭果綠深魚占陰何當脫塵鞅重此契幽尋

贈方外閒人

白日青天外壺中別有春江湖萬里客宇宙一閒人採
藥雲歸袖看花月滿身何時重會面醉拂布袍塵

遊江陰君山

孤嶂臨滄海千山湧大江遠帆歸市獨高塔倒波雙鷗
鷺爭洲淑蛟龍怒石砭壯遊心未已飛雨灑樓窻

遊潯墅龍華寺

偶到龍華寺因同半日留禪林將結夏客路尚如秋衆
樹綠偏靜一花紅更幽最憐高岼柳容易繫行舟

遊虎邱

海上地偏勝吳中山更奇畫圖雲洶湧冠佩石參差花
落談經坐苔封試劒池倚闌烟水闊千載一鳴夷

聽雨堂為周叔量賦

聽雨高堂上君家好弟兄樹深催暮色竹密助秋聲列

坐情方適連床夢屢驚却憐江海闊鴻鴈每孤征

題韓與玉所藏春山行旅圖

乾坤春浩蕩江海日舒徐孤客千山騎雙童一篋書桃花溪口渡松葉嶺頭居何日西湖上從君晚結廬

台州寄楊子秀

路轉千峰合溪通一帶斜飯炊黃渡雪酒染赤城霞未訪仙人宅先尋博士家近聞歸隱處盡種碧桃花

興化湄洲島祠天妃還

清朝嚴典禮宣閣遣詞臣衣帶天邊雪花逢海上春稍
能更祀事亦足慰疲民萬里行方遠朝來更問津

又

夜宿吳山上朝行莆海東地偏元少雪天闊自多風不
見波濤險寧知造化功百年神女廟長護海霞紅

題程以文竹雨山房

山人愛種竹竹高上雲端屋近琅玕潤林深翡翠寒好
栽鳴鳳管莫截釣魚竿白髮相鄰處時時一問安

又

天上春雷起山中夜雨過林聲遙帶瀑池影淨生波對
坐此君獨迎門稚子多何時深翠裏擊節共長哦

梁山樂

涼雨忽飛過濕雲猶湧來渚花紅陣陣汀樹綠堆堆一
鶴搏空起雙鳬觸浪開梁山非舊俗禾黍滿高臺

東昌次孟景章韻

溪滑魚苔淺沙柔馬蘭長一鷗當水浴雙燕背人翔客

路頻看月征帆尚帶霜灣灣見花柳回首重思鄉

送陳子敬赴南昌尉

送君南作尉黃綬去翩翩縣倚邊江郡花迎上水船自
憐官主印人喜吏如僊定見雙鷗鷺飛來御史前

送國子伴讀張德貞歸湖南

薊北湖南路孤舟萬里程晴天黃鵠健春水白鷗輕芳
草歸時恨閑花別後情定知袍笏貴不似綵衣榮

南城監試和同院張進遠韻

清朝隆禮治儒館榮賢良冠冕山河大文章日月光九
闕嚴虎豹千仞下鸞鳳此日橋門盛何論漢與唐

送李盤野

秋水芙蓉岼孤帆天上歸青山四面起白雁數行飛里
父供新釀家人澣舊衣封侯定何事且理釣魚磯

題劉子明西雲亭

野樹偏宜晚江花欲變秋幌明霞散綺簾暗月沈鉤解
補青山闕還生白髮愁何時作霖雨却共水東流

送國子生哲德明歸淮西覲省

落日青山外西風白雁邊
幾人同飲酒一客自開船
江蟹經霜美淮魚出水鮮
遙知到家日白髮語燈前

送華以愚南歸

禁城秋雨後奈此薄寒何
江上書來少吳中客去多
莫帆依橘柚晨爨就蒲荷
遙想歸榮處鄉人日醉過

分題得獲麟堆送李伯貞廉使往山東

正朔周王紀春秋魯國書
瑞圖齊鳳鳥麟趾應關雎
絕

筆懷西狩揚鑣過舊墟泰山青萬古相對一躊躇

送僕元魯應奉代祠海嶽

天子臨丹宸祠官侍玉除香從中禁出祝遣北門書海
若通方貢山靈候使車青春隨處好六轡且徐徐

送蒙古彭教授往高州

萬里高州路憐君此日行藤陰頻駐馬榕葉亂啼鶯人
到烏蠻異官同博士清定知江海上殊俗盡諧聲

居庸關觀新寺

渡水復渡水上山重上山黃金鑄菩薩白玉凍潺湲數
騎朝還驛千夫夜守關帝城行欲近喜色動衰顏

將干嶺

絕頂低高斗重關壯北門隴雲浮地白谷水帶泥渾宇
宙神功大山河帝業尊小臣叨載筆華髮感深恩

赤城

山近雲連驛沙虛雪擁村瓠壺縣穀種土銼爨柴根凍
雀來依幔晨鷄立傍門客中甘澹泊不必問盤飧

題黃觀瀾卷

碧天看不盡滄海去無邊
氣湧風雷動光涵日月縣
奇文方浩瀚餘景尚漪連
好種珊瑚樹他年繫釣船

送趙宗吉赴河間太守

闕下聲名舊河間
治化新一麾方到日
五馬已行春報最寬明
主緘書慰老親何時鳳
池上重與掌絲綸

題雪軒

白天陰欲合冷日景微遮
風勁將飄絮春嬌且弄花
照

窻冰柱直印几玉文斜試聽吾伊處山南有幾家

圓修寺雨後書懷三首

長風動高樹疎雨落空庭傍几香烟白開簾樹色青病
軀便倚杖老眼倦繙經為問新來雁何時過敬亭

又

晨起坐堂上白髮亂如絲野鼠銜梨果山禽繞竹枝寸
心甘自許多病竟誰知賴有溪南友時時慰渴饑

又

開窗對修竹日莫更深寒感慨情偏極棲遲淚不乾酒
醒驚絡繹衣薄怯闌干烽火何時息餘生得少安

和前韻

病多疏白墮心靜熟黃庭日莫藤蘿暗天寒橘柚青蝸
涎綠畫壁蛛網綴幽經睡起成長嘆浮生一草亭

又

眼花風瑟瑟心緒雨絲絲狡兔成三窟鷓鴣寄一枝青
雲慚故友白髮感新知最好南山石相看可樂飢

又

日移棋局晚山落酒盃寒欄蝶穿花濕窻禽飲硯乾夢
魂空宛句音問阻長干多病文園客秋來強自安

春晚書懷

東吳喪亂後消息竟何如日望平安信空傳報捷書壯
心徒感激老淚獨欷歔坐對垂楊晚行人江上疎

又

江黑雨將至水高潮正來花隨兩岼別鷗逐片帆開世

治逢多難吾生愧不才飄零漆白髮見者莫驚猜

寄靜庵上人

細雨桐花晚微風麥氣秋王符偏好學宋玉不勝愁世事同蕉鹿人心類棘猴何時虎溪上還共遠公遊

憶姪景

相望亦何遠夢中頻見之干戈連數歲書問動經時寂寞揚雄賦飄零杜甫詩江東春樹綠偏重阿咸思

又

自汝南臺去棲遲兩見春
鼓鼙江上月烽火海邊塵
衰病全非昔傳聞總不真
近知更大將旗幟一時新

憶吳會草堂芭蕉寄汪仲恭

別後芭蕉樹青青定長成
月移窻上影雨送枕邊聲
愛惜煩吾友飄零愧此生
更需花實大同飲露華清

和馬仲臯立秋韻

酒盡青山莫書從白雁過
長風斷疎雨缺月掛明河
故國逢人少新秋到客多
不知滄海上何日罷干戈

又

一向城東住荒涼客少過疾雷時送雨陋巷忽成河自
許丹心在誰嗤白髮多平生二三策可是勝橫戈

題朱質夫東莖草堂

幽人海昌住草屋向村墟擊竹頻呼鶴分泉謾種魚梨
花春巷冷榆葉夜窻虛細雨篝燈火匡床正讀書

題奧屯秋江墨蹟

滄江渺何許歲晚正愁予密諫囊無橐閒吟卷有書青

天來驚鷺秋水照芙蓉風致今誰似令人憶使車

贈李可度

當年丞相掾孤劒泊天涯白日懸心事青春老鬢華定
憐鴻有路終愧燕無家志士須聞道人情付落花

赴京道中

風雨新河口孤舟此日行送多親友義別見弟兄情路
識春山熟洲迷雪水生臨岐重回首一雁起江城

茅市簡友人

顧我行方遠憐君意倍親雪逢依渡口雨笠待河濱酒
熟還留飲詩成不厭貧相期重下馬花柳隔年春

贈張士方

昔年東海上曾共綉衣行小吏銜冤久分司用法平江
沙清可數海月晦還生陰德今誰似于公有令名

以拄杖贈程以文先生

海上桄榔樹殷勤舉一枝功能扶正直力可濟顛危文
玉膚生潤玄犀質換奇何時同野服江海遠相期

茂上人古木圖

老龍起聽法蛻骨在空山雲迥青天濶風來白日閑曲
身雖偃蹇直氣自孱顏株坐誰偏似禪歸晝掩關

鵬窩驛

鵬鶚入雲去空巖遺舊窩冷烟迎日少晴雪背陰多擾
擾羣鳥集蕭蕭數騎過此時孤館客歸思竟何如

洪棧驛

萬壑從東下羣峰向北圍牛車絙水去驢馱負薪歸隙

日斜窺戶尖風直透衣
羈懷正無賴一鶚向南飛

王元吉蘿月山房

每愛城南宅空庭坐夜分
陰垂青裊裊光漏白紛紛
卷幔飄花雪開尊度碧雲
何時寒薜荔猿鶴與同羣

殺上人蒲室

上人蒲作室絕似睦州禪
父母今誰養弟兄惟汝賢
齋房連紫竹佛座擁紅蓮
明日長蘆去春江正拍天

許光遠先世讀書樓

高樓當海上有客正看書門對千峰暝闌回萬象虛榜
聲飛宿鳥燈影避潛魚留得題詩在諸孫更卜居

會稽韓道士滄洲

風雨四山至空江生早寒白鷗秋水黃鵠暮雲端杜
若人移棹蓬萊客倚闌何時分一曲同把釣魚竿

玩齋集卷三

欽定四庫全書

集部

玩齋集卷五

詳校官編修_臣范來宗

中書_臣劉源溥覆勘

覆校官主事_臣龔敬身

校對官中書_臣王鍾泰

謄錄舉人_臣劉禮

欽定四庫全書

玩齋集卷四

元貢師泰撰

七言律詩

和石田馬學士殿試後韻

丁卯歲學士與先君同為讀卷官在院倡和
甚多此則放榜後所作韻也

春風馳道入宮牆
青鎖深沈引夕郎
草染綠波生太液
花扶紅日上披香
聲名已重千金壁
恩寵方隆七寶牀

治世斯文今極盛
九天星斗自成章

送賈有恒赴潞城縣令

上黨人參五葉齊
郎君今日馬行西
滿溪藍水魚初上
繞縣青山鷺亂啼
小吏報籌衙欲退
長官封印手還題
洛陽自古多才思
好賦新詩寫赫蹏

送陳太祝使江浙收禮器樂書二首

天子齊明奉宗廟
容臺祇飭備儀章
雲雷出地雕彝鼎
日月懸天畫衮裳
驛騎書停山木蔭
船窗風度水花涼

過家莫醉紅樓月上國迴鸞欲締嘗

六月樓船泛御河太平樂譜自編摩鳳鳴嶰谷曾吹律
馬出蒲梢更作歌古尺要將諸部定新聲還用四清和
器成早入神庭奏人頌明時瑞應多

壽庫庫子山學士

上林春滿樹蒼蒼別殿新頒外國香龍虎風雲依日馭
斗牛河漢列天章瀛洲勅賜黃金榜學士名高白玉堂
千載太平今有在文昌高映紫微光

崇真宮醮罷勅畫吳宗師像

海日曛曛照九衢
靈旌霞旆擁高居
尚方勅畫僊官像
中使傳宣學士書
劍氣朝寒垂白練
丹光夜暖出紅蕖
石壇醮罷清如水
猶聽松陰起步虛

贈盧醫

豫章盧斌好遠遊
落魄燕臺今白頭
酒家不識灤都尉
女子迺知韓伯休
天祐結實庭戶晚
山藥作花籬落秋
投老欲歸尋舊隱
忽騎孤鶴過揚州

畫馬

漢家旌節渡流沙
奪得戎王鐵喙騮
天上白魚秋弄影
月中玄兔夜生花
九圖妙入將軍筆
八駿神空阿母家
獨控奚官更超絕
長楸錦隊謾如霞

送黎兵胡萬戶南還

將軍仗策去安邊
詔下東南萬里天
雲海旌麾趨玉帳
春江鼓角載樓船
黎人滿溜檳榔水
蠻戶齊分牡蠣田
遙想軍中無一事
坐驅千騎獵平川

送陶翁歸豫章

秋雨初晴攬香蟹紅魚白憶江鄉十年客枕鷄聲月
千里歸帆雁背霜入室親朋羅酒饌上堂兒女挽衣裳
逢人莫說京華事漢署今無白髮郎

費秀才進所著春秋歸

雲滿青山雪滿頭一生辛苦著春秋抱書不向公車獻
遣使須煩謁者求翁子行年當富貴虞卿終老豈窮愁
玉盃繁露應非舊更請先生為校讐

送壽弘毅應奉赴興國路經歷

院門深鎖落松花東接蓬萊小海斜絳蠟夜深催視草
紫泥春早聽宣麻鳳凰池上人辭直鴻雁江南客過家
幕府秋來清似水吟詩應對白鷗沙

次泗安光上人韻是日聞有供奉之除

水氣朝寒生白烟寺前楊柳繫吳船佛燈紅映流蕪座
僧榻青裁海艾氊書報誤叨金馬召厨空應愧木魚懸
定知別後相思處楓葉蘆花宛句邊

天壽節日大明宮朝罷口占柬張約中博士

金門珠箔轉迴廊文武分班有舊章
花露重沾腰珮濕松風輕度鬢絲涼
仗隨騏驥通朝貢盃進夔龍祝壽康
最喜太常張博士清標如雪照鵷行

江浙獻嘉禾賀丞相朶公

玉燭金穰屬化鈞九農和氣洽深仁
靈根獨占山河秀顆粒先迴宇宙春
天上畫圖方入貢江南簫鼓正迎神
作書願紀成周治慚愧無才備史臣

南城試院和張仲舉博士

紅燭搖光坐夜分
學宮魚鑰鎖重門
歸心已逐南湖雁
壯志空慚北海鯤
傍几香添霜漸冷
隔簾燈過月微昏
校文歸向西曹日
會送夔龍謁至尊

送林希元應奉赴上虞縣尹

居庸雪消河水深
南行賴有買舟金
相如多病因能賦
東野長貧為苦吟
已許姓名辭鳳闕
更傳聲價到鷄林
白頭作縣臨東海
誰識先生去住心

送余廷季赴海東僉憲

綠髮相從白髮生都門握手倍多情
論交豈少新朋友對酒何如老弟兄
玉節綉衣江上騎苑花宮柳日邊鶯
使星一夜移東海定遣文章到兩京

試院和周伯溫待制韻

羣僊盛集瀛洲館丹鼎芙蓉徹夜開
斗下璿魁聯外府坐間珠唾落中台
黃封酒醉賓筵散絳蠟紗籠佩馬迴
禮樂光華當此日九重側席正需才

送蘇伯修侍郎赴淮東廉使

黃金臺上受新恩，還向長楊謁至尊。
行殿曉寒頒玉節，驛亭春暖簇朱幡。
青蒲葉短烟波濶，黃柳枝長雪水渾。
別後新詩好相寄，廣陵冠蓋接都門。

送吏部郎中王可表出守棣州

別殿春深奏選歸，雙旌新賜出王畿。
齊東山水開船近，天上星辰聽履稀。
竹馬總來迎使節，金魚猶似掛朝衣。
遙知宸政還車日，定草封章謁紫微。

題張真人父一間堂

真人騎鶴下蓬萊
詔許諸孫次第來
玉佩春隨黃道轉
綠章夜並紫雲開
香分別殿傳中使
書賜名山映上台
還向僊都拜家慶
碧桃千樹擁霞杯

送周舍人赴山南宣慰司照磨

紫衣袖窄金圍重
花底傳呼出殿遲
欲向新年開幕府
還思舊日進朝儀
雪寒淮水魚方出
歲晚江陵橘尚垂
料得中朝盡知己
重來應是不多時

送篤敬夫赴南臺御史

御街初日柳梢紅
鴈角新冠出禁中
天上使華恩詔密
江南民瘼奏書通
九霄風送孤飛鶚
萬里雲隨一駒驄
欲把真心酬聖主
青松多種石臺東

題四川張萬戶夫人貞節卷

白帝樓前巷陌深
將軍旌旆正沈沈
玉簫聲斷孤鸞曲
綠綺絃空別鶴吟
豈是人生輕一羽
要知妾死重千金
春風冢上連枝樹
只有韓憑會此心

贈僊居散人

青山四面玉嵯峨中有山人隱薜蘿
細雨開門芳草滿微風深澗落花多
童窺丹竈時驚鶴客寫黃庭欲換鵝
我亦平生愛疏散春來應許謝朝珂

送道士王仲遠還江州玄妙觀就東李子威太
守

羽節參差陸離蓬萊坊裏日偏遲
花邊奏簡雙鸞至松下攜琴一鶴隨
白日常過燕市飯青春忽動庾樓思

江州太守吾知己為說年來鬢已絲

送大都路陳學錄使往江浙造祭器雅樂

世祖投戈事邁豆素王宮殿在南城百年禮樂當今日
一代文華寄此行潞水朝寒初過雁浙江春晚尚啼鶯
還鄉莫為尊鱸遲祀典由來重兩京

送呂師賢赴山北憲使

白月微沈曙色紅憐君書劔別匆匆臺高日望羣鳥北
海濶雲隨一鶴東俗古尚遺箕子教官清還慕伯夷風

遙知六轡巡行處馬上看山日日同

送東流葉縣尹

江流東下縣南遷一簇人烟野岼邊
荻笋洲青鷗鳥狎楊花浪白鱗魚鮮
印來聚吏排衙鼓社到隨民出俸錢
應是綉衣行部處攔街齊頌長官賢

壽吳宗師

帝遣真僊位上卿五城迢遞接蓬瀛
雲浮紫氣旌幢潤日射紅光劒佩明
池館書閑教鶴舞江湖歲晚結鷗盟

軒轅曾訪長生術應信崆峒有廣成

贈毛李祥還江南

白面書生江漢客幾年琴劍落京華聞鷄曾度居庸雪
立馬還看上苑花楊柳枝長方去國薜蘿葉短已還家
遙知綵袖娛親處酒暈微生兩臉霞

送臺典張子誠辟山北憲史

芙蓉幕府清如水愛子新來意氣多天近烏臺依執法
風清黃閣聽鳴珂燕山北望千峰盡遼海東迴一騎過

刀筆曾為漢丞相起家應不愧蕭何

送安南使者黎括省之

四海光華明主德萬方奔走遠臣心來依北斗朝閭闔
歸逐南流過鬱林椰子酒酣歌踴躍刺桐花落馬駸駸
遙知下國郊迎日首啟金函播玉音

送舒亦誠南歸

芳草生庭履跡稀棠梨花落燕交飛題詩忽報客將去
出戶却知春已歸天上雲開黃鵠健江南水長白魚肥

人生最是閒中樂早晚相從賦式微

送黃子中南還

雪風吹寒春尚遲暗黃恰上楊柳枝東門立馬旋沽酒
南浦停舟還賦詩去路間關須約伴到家歡喜總忘疲
相如自是多才思未必閒居兩鬢絲

廣微天師祈雪有應詩以美之

九枝鐙照碧壇空龍虎旗高滿殿風綠簡夜深朝玉陛
素幢春淺拂珠宮一天凍色星河合萬里冰華陸海同

明日內家應錫宴綵符爭取綴釵蟲

送王彬叔赴淮西憲史

黃金築臺高嵯峨抱犢憐君日日過丹鳳銜書辭翼闕
白魚供酒過淮河京華遠去交遊少幙府新來贊畫多
料得聲名從此起分司行處聽民歌

送連子奇歸隱贛州

薊門風冷白鵝來萬里孤舟一日開去路定過彭澤縣
到家重上鬱孤臺煮茶林下收黃葉珮釣磯邊掃綠苔

太史明朝占處士少微依舊傍三台

送馮叔敬赴江西醫學提舉

柳花飛盡綠陰多萬里歸船發御河自嘆官閒無客到
却憐君去有誰過丹成海上收瑤草酒熟江南醉碧荷
何日定將醫國手為民談笑起沈疴

送黃季亨赴永嘉松山巡檢

萬里船開直到門江南楊柳雪紛紛馬前士卒爭誇武
坐上將軍喜論文夜月村深宜紡績春風海熟稱耕耘

舊時逸少曾遊處綠水青山帶夕曛

題河間榮溥孝義堂溥嘗事哈克繖丞相既被罪
衆皆散溥獨收尸以葬後又白其寃得復封
爵今溥官亦至四品云

丞相門前客如市一落陷阱烟塵空解衣哭尸壯士志
吞炭報主前人風氣摧青山作平地精貫白日成長虹
當時富貴不復見惟有節義垂無窮

上都咱瑪大燕

紫雲扶日上璇題萬騎來朝隊伍齊
織翠轡長攢孔雀
鏤金鞍重嵌文犀
行迎御輦爭先避
立近天墀不敢嘶
十二街頭人聚看
傳言丞相過沙堤

樓閣別殿擁僊曹
寶蓋沈沈御座高
丹鳳銜珠裝騾褭
玉龍蟠甕注葡萄
百年典禮威儀盛
一代衣冠意氣豪
中使傳宣捲珠箔
日華偏照鬱金袍

卿雲弄彩日重暉
一色金沙接翠微
野韭露肥黃鼠出
地椒風軟白翎飛
水精殿上開珠扇
雲母屏中見袞衣

走馬何人偏醉甚錦鞬賜得海青歸

簫韶九奏南風起沙燕高低撲繡簾醺綠酒多杯迭進
鷓鴣香少火重添舊分宮錦綠衣褊新賜奩珠簇帽簷
日午大官供異味金盤更換水晶鹽

清涼上國勝瑤池四海梯航燕一時豈謂朝廷誇盛大
要同民物樂雍熙當筵受几存周禮拔劔論功識漢儀
此日從官多獻賦何人為誦武公詩

過柳河

野曠山寒露易霜
短榆疎柳路茫茫
雨來黃潦聚成海
風過白沙堆作岡
驛館到時逢數騎
馳車宿處錯羣羊
客懷政爾無聊賴
忽見南飛雁一行

將干嶺

病體朝來正苦寒
驛程又報度將干
出門莫怪山谿險
到嶺不知天地寬
鶴背旋風欺客帽
馬頭飛雪點征鞍
此中自是神仙境
何用吹笙駕玉鸞

榆林有感

老夫白髮已如許山後馳驅動數年正為貧民均馬政
何嫌富戶倍車錢人生要在心無愧物論難齊理自然
欲盡微忠報明主簡書深夜手重編

送上都吳學錄歸河東就試

驅車直渡灤河水千里青山半月程自信文章當世用
人言書劍到家榮上林久已稱司馬宣室終須召賈生
料得鳳池春色滿柳陰立馬共聽鶯

上京和周伯溫御史韻

漢室論功誰最多封侯第一是蕭何從知將相元無種
却笑神仙亦有魔映月蠹魚成脈望倚風飛燕避淘河
憑闌欲說行藏事萬里長空碧似磨

輓李千戶

灤陽草色易黃昏忽報將軍號令新落日青山移石壘
因風白野動邊塵雙弓直挫三千士一劍長先五百人
太史已書忠孝節佇看高塚卧麒麟

榆林道中

兩行官柳夾長隄，縷縷青絲拂面齊。
馬上睡來渾似醉，客中詩就却忘題。
一天煩暑都成雨，百里平沙不作泥。
自笑微臣頻扈從，年年載筆度山溪。

興安道中

萬重山後人行路，五百年前古戰場。
落日枌榆接鷄犬，秋風禾黍沒牛羊。
自逢治化躋堯舜，誰論封疆過漢唐。
慚愧小臣無補報，清時白髮許徜徉。

寄王魯川推官

公庭草綠訟聲稀時見雙雙蛺蝶飛
曹吏盡隨衙鼓散
理官獨抱獄書歸
曾同太守行紅旆
更與高僧別翠微
近報兩臺多辟薦
殿前早晚賜朝衣

送胡斯文辟南臺掾

鳳凰臺下水東流
潮去潮來白石頭
細雨一帆人到岼
清風兩袖客登樓
幕開江上紅蓮日
書寄山中碧樹秋
珍重此行多意氣
繡衣玉節定重遊

送倪秀才從學維揚

日日南風吹水立掛帆槌鼓下解艘青山落酒幕到岼
明月照書還倚窻文章少年誰第一才華近日子無雙
綵衣在篋須頻著歲晚還時鶴過江

送孟景章赴廬州判官

先帝初開太禧院一時郎吏盡瓌奇名高闕下心如鐵
官到淮南鬢已絲月照寒庭空視牘雲開秋興偶成詩
舊遊天上多相憶早折梅花寄所思

送友人還錢唐

海門飛雪湧潮頭，萬里乘風起壯遊。
隔嶼爭呼楊柳渡，到家先買浙江樓。
才高班馬非無賦，世治蘇張似少謀。
賴有玉堂知已在，人生何必定封侯。

送宋仁甫赴池州陰陽教授

北風吹雪路漫漫，萬里荆門客正寒。
自愛青山同博士，也勝白髮老長安。
城南款段此時別，江上芙蓉到日看。
我亦春來買舟去，九華絕頂望揚瀾。

贈日者范竹友

溪流繞屋綠如苔箇箇琅玕手自栽勁節久宜君子號
清懷近為故人開夜窻風雨驚龍起秋谷烟霞待鶴來
誰似丹陽袁太守時時車騎一裴回

送吳師禮赴池州直學

大江西下九華東古殿重扉鎖學宮載酒滿船歌白苧
題詩送客憶青楓蒲蓮歲熟倉箱實鹿豕秋肥俎豆豐
遙想郡齋多暇日壺觴時在翠微中

題括蒼潘照磨具慶堂

十年孤客三尺劒七袞雙親萬里家江上離歌催疊雪
山中壽酒酌流霞登堂白髮同鳩杖繞徑紅顏共鹿車
莫羨飛丹似霜雪括蒼巖畔有松花

送徐復初辟掾南臺

闔閭城外望金陵千里江流一帶青桃葉風生催客渡
杏花雨過別郵亭黃金臺上書方到采石磯邊酒却醒
應是紀綱多暇日綠陰清晝坐閒庭

芝庭為吳中靈子文賦

斜闌曲檻護春晴五色金花照眼明南極尾低凝瑞采
東吳雲近結華英封書欲跨青鸞奏上壽還隨白鹿行
謝氏諸郎才總俊唯應幼度最知名

送醫士王安重

滿天風露氣蒼蒼十二臺高桂子香白兔夜寒分玉白
紅蓮春暖長沙床上醫名就肱三折大藥功成視一方
海上謾傳瓜五色長生元不遠昌陽

贈寫神鏡塘上人歸京口

鶴翎風動碧天涼
寶月新凝百鍊霜
水面散成千種影
波心元只一輪光
玉簪道士來空室
金粟維摩現十方
此去要觀真法相
却收畫本過維揚

別周鍊師雲臺真館

二十八將已僊去
真館有臺名偶同
白鶴十年來故國
青山萬疊起神宮
有時採藥幽澗底
無事種花深谷中
昨夜曾攜龍虎出
一壇明月滿旗風

送周希元高士歸廬山

萬里江湖第一關波濤洶湧接廬山九華雲度青天閣
五老峰迴白日間鍊藥房中猿候火散花壇上鶴隨班
何時倚棹清溪曲一笑相從覓大還

送韓執中還錢唐

萬里長江風浪多拂衣長別意如何獻書賈誼非無術
決策揚雄自有科羽檄定逢河上捷畫船還聽越中歌
何時乞取閒身去共倚湖亭醉碧荷

題廬山楊宗鄉思永樓

危樓百尺倚匡廬西蜀衣冠幾世居對客每傾桑落酒
傳家猶有草玄書天寒倚柱招黃鶴日莫憑闌數白魚
萬里岷峨歸未得亂雲飛處正愁予

新蝶

杏樹生香蠹化成向人飛下不勝情寒辭薄翅猶粘粉
暖溢柔鬚始弄晴燕舞盤中嫌露重鶯歌扇底避風輕
春閨未解南華夢乞與滕王為寫生

月舫為裳鍊師賦

老龍吹浪滿江湖雪兔西飛碧落孤太乙方乘蓮一葉
藥僊還倚樹三珠開窻白露沾瓊佩對酒寒光射玉壺
萬頃秋波看不盡却攜靈藥上玄都

送成誼叔應奉分院上京並呈謝敬德學士

太平天子重時巡首詔詞林擢侍臣書載駝車隨劒珮
射從熊館代絲綸片雲忽送摩姑雨五月方開芍藥春
想得班揚才最膽龍山立馬賦詩頻

柬呂仲實左丞

十五年前舊供奉一官留滯越王城不因左轄輸公道
誰向南州進老生史學是非從筆削人才輕重在權衡
甘泉奏對歸來晚猶草封章獻治平

送趙國瑞舍人赴澤州同知

太行雲起亂山青馬上風吹別酒醒試論文章惟晉國
還思典禮在虞廷賣刀民化耕春雨佐印官清戴曉星
回首晴霄十萬里大鵬終見徙南溟

送明原道赴南豐判官

日華西轉萬年枝記得甘泉奏賦歸佩馬新迎州倅節
緋魚舊賜從臣衣詩成江驛梅花瘦酒醒山城蕨菜肥
為謝南豐舊詩友白鷗春夢繞苔磯

送江西傅與礪赴廣州教授

買得吳船便欲東更騎羸馬別諸公文聲久許江西盛
詩律因歸海外工人羨義陽封介子客從秦時薦揚雄
五羊城下南風起茉莉花香荔子紅

彭叔興赴尼山書院長

少年才學動儀曹旋賜朝衣換鵠袍萬水東歸滄海濶
千厓北拱岱山高杏花壇近蒸紅雪楷木林深漲碧濤
珍重此行多令譽古來齊魯出英豪

寄郡士陶公美

問君生事竟何如亂石溪邊小卜居止酒久知揮白墮
論詩今喜到黃初天寒門外數株柳歲晚山東一束書
賴得西庄頗相近蒼頭時遣寄雙魚

天寒落葉滿庭臯此夕思君正鬱陶百里青山來款段

一庭明月舞豪曹賈生未遇才因大王粲雖窮氣自高
何事相逢久相別且燒紅蠟醉春醪

輓侯敬文秀才

客裏青燈二十年手書細字動成編扁舟觸熱方辭館
孤劍橫秋已夢僊山下數椽仍舊屋溪南半頃足新田
可憐鉅鹿侯芭去誰與揚雄論太玄

采石和劉顯仁即事韻

下水春生巴蜀雪上江人駕武昌船晚風天外三弄笛

落日淮南一簇烟
斷岬淺莎行獨鶴
危磯倒樹立雙鳶
綵霞又報明朝霽
瑟瑟紅光萬縷懸

徐州

白雲天際散如衣
四面青山落水涯
鑿石空遺唐將廟
連峰猶豎漢臣旗
魚龍浪挾黃樓動
牛斗星隨碧漢垂
醉倚船窗問河伯
濁流何日是清時

冠州

萬里關山鬢已華
冠州橋下御河斜
千門烟冷分榆火

三月春寒見杏花新水聚船人趁市順風吹旆客還家
莫憐書劍頻漂泊擬學東陵老種瓜

送江生還江南

漕河冰泮水溶溶百尺帆開五兩風戲綵歸人從海上
倚門慈母問遼東漁罾荻笋灣灣綠酒旆桃花處處紅
莫向江南久留滯龍山還有北來鴻

送賈舍人赴廣東宣慰司照磨

五月南風起舳艫番禺曾是趙王居貔貅萬竈新趨幕

虎豹千門舊直廬
茉莉編籬香旖旎
藤接屋影扶疎
故人畫諾如流水
報政還應得最書

代祝還呈太師

丞相傳宣出紫宸
鶯花萬里浙江春
捷書近已擒豺虎
瑞紀還先慶鳳麟
宇宙經綸歸聖主
山河帶礪屬元臣
幾迴凝睇雲霄上
夜夜三台拱北辰

年來供奉屢遷官
聖主恩同宇宙寬
左部正慚疎吏牘
西曹仍許進儒冠
清時有道遭逢易
白髮無才補報難

却上船頭望江月天風吹露不勝寒

新州寄馮養素彥明二都水丞

天子時巡猶北駐詞臣將命許南行
遠聞都水來新濟到說分司在鄆城
玉節遙知連海潤金函近見報河清
丈夫莫為離愁惜要把文章佐太平

朱仲文編修還江西諸公分題賦詩為餞予適
同載南歸約至揚子橋分別因為賦此

瓜州渡口山如浪揚子橋頭水似雲
夾岸芙蓉紅旖旎

滿江楊柳綠紛紜一杯酒向今朝別萬里船從此處分
他日重來須艤棹莫教驚散白鷗羣

邳州和劉顯臣韻

吳船蕩漾一毫輕楚客飄零萬里情驟雨挾雲行斷岾
亂山湧浪入孤城黃河風起鷗無侶紫塞春深雁有程
莫怪仲宣多感慨朝來白髮鏡中生

晚泊邳州

一帶黃河百折灣下邳城外更潺湲烟迷兩岾疑無地

日落中原喜有山法重鹽租嚴犯界官多魚稅倍征關
白頭父老相逢處猶似圯橋授履還

彭城懷古

戲馬臺前擁旆旌三齊纔破到彭城項王帳底猶虞舞
漢祖軍中盡楚聲百二山河功自棄八千弟子勢都傾
丹明間却烏江渡長使英雄恨不平

崔鎮喜邵少監至

使君五月渡黃河白髮依然壯志多且喜掛帆來舊約

何妨醺酒起高歌
船頭北斗五更落
柁尾南風連夜過
自笑驅馳成底事
漪湖間却釣魚蓑

高郵夜泊

薄莫秦郵聚客船
孤城三面接冰田
戍樓月映高低雪
墟市星搖上下天
千里綠蕪分曙色
萬家紅粟起炊烟
南風忽起舟人便
幅幅蒲帆盡北懸

揚州別韓克莊僉憲

紅日東生綠霧收
海風吹客到揚州
露分僊掌金盤冷

香動瓊花玉樹秋使者乘驄開大府
僊人騎鶴醉高樓
朝來別我垂楊岸珂佩如雲簇水頭

婁家港祠神回寄元臣僉憲子約監郡

焚香海上祠神罷獨駕樓船夜半迴
萬里長風催掛帆
一天明月阻登臺綉衣人仰邦侯至
玉節官分水部來
咫尺相望不相見白蘋洲渚重徘徊

江陰君山次陸子方韻

畫橋垂柳傍官壕夾岸青山擁雪濤
楚相邱墟遺石馬

吳王宮殿壓金鰲，天迷鴻雁江流濶。
風撼魚龍海氣高，此日登臨無限意。
古今消盡幾英豪。

輓汪尚書妻譙國夫人

尚書謝政江南去，特許夫人大國封。
春日上堂尊酒共，歲時環坐綵衣重。
離鸞忽奏雲中瑟，別鶴還歸隴上松。
白髮夫君正愁絕，空江何處採芙蓉。

輓王君佐秀才

十里青山宅一區，平生甘分隱樵漁。
新詩自寫因求序，

故篋常隨為教書杖屨在門人去遠壺觴掛壁客來疏
白雲滿地松陰冷孤鶴時時守墓廬

和楊德章監憲詠物詩

僊子初裁蜀錦裳玉壺清映內家粧一百五日花尚好
三十六宮春正長新綠漸生應帶露舊紅微褪為經霜
自從深院留題後一任東風上下狂

右瓶中百
日海棠

僊標厭入錦雲鄉却傲冰霜取次芳銀燭高烧遊太液
紫綈初拂侍明光春撓杏帶微生暈暖漏梅梢欲試粧

不是東君偏耐冷要將風韻入詩囊

右冬日海棠

送蜀士史道章訪蕃昌張縣尹

上江船裏枕書看雪浪千堆寄一翰
太白山人元蜀學蕃昌縣令只儒冠
渚花對酒公庭晚沙草憐衣客路寒
攜得琅玕滿歸袖謝公堂在碧雲端

送赴試春官

水落沙痕寄岼齊冬深無雪薺生泥
遙知上馬徐州北且看開船句水西
待詔門開金駟裏榮恩燕賜玉偏提

若將文字追時好萬里雲霄自有梯

送內官棄職買書歸蜀立三賢祠

內官買書三十萬從此聲名天下知
正為身輕歸印早不妨船重到家遲
客非杜甫依嚴日人是文翁化蜀時
愧我無由能載酒敲門頻問子雲奇

輓陳公輔縣尹

短衣垂脰寄遺孤自立聲名重里閭
座上鼎彝前代器篋中經史外家書
縣花春老初封印庭藥秋慵久廢鋤

惆悵冰壺清絕處
露寒應是泣蟾蜍

峨眉山

霧作衣裳雲作屏
玻璃萬頃著娉婷
望夫石上偏多雨
織女河邊欲隕星
蟬螭夏涼收淺絳
蟾蜍秋冷抹長青
可憐天際微顰處
六代興亡一夢醒

詠姚氏瑞蓮

雨洗瑤池六月涼
侍兒初試錦雲囊
花開雙鳳迷歌扇
子綴羣蜂背蜜房
波淨忽成溪女匹
露寒却笑月娥孀

合歡帳底鴛鴦夢，
臂枕猶聯玉雪香。

題丁元善鍊師陽明樓

賀老家西百尺樓，
好山多處稱僊遊。
丹光散作霞千縷，
劍氣吹成月一鉤。
窻外鶴歸遼海暮，
袖中龍起鑑湖秋。
道人久直黃金殿，
可使歸來雪滿頭。

謝季衡上人惠松花湯餅

雲門寺裏青松樹，
五月南風花正香。
膜粉輕披魚子白，
藥珠重綴蜜脾黃。
餅和甘露曾分送，
湯合僊霞更共嘗。

慚愧老僧多意氣一杯毛骨盡清涼

送國子掌儀魏居仁還山東

京國相逢二十年當時綠髮盡華顛升堂獻贄吾居後
立館司儀子在先夜雨溪聲連客枕夕陽山色滿歸船
古來齊魯多奇士側耳聲名起日邊

贈淵上人住涇縣延壽寺

半生辛苦住城西修竹滿園蔬滿畦正愛閒雲依疊嶂
忽隨流水度三溪藤花院靜禪初定榭葉村深路欲迷

此去莫憐知己少青山到處好留題

登會稽寶林寺塔

百尺浮圖東海上晴天目力見秋毫莫愁風露衣裳薄
且喜雲霄步武高屋角長松來鶴背城頭荒草落鴻毛
闌干倚遍心猶壯更待持杯酌雪濤

送山陰賈縣尹

公吏呼籌催坐衙朝朝下馬事如麻三年作官惟飲水
萬里還朝先過家賈傳席前因獻策潘郎縣裏只栽花

江船明日西興渡兩岬青山白雁斜

和王繼學憲使玉泉觀魚韻

一方寒玉浸泠泠天上雲開影倒青
卓錫黃龍曾聽法
撫闌頰鯉亦通靈明珠碎逐涼風散
濕翠空圍月露零
此日使君行樂處一時民俗自清寧

陪僕少監海修撰飲西湖

十年不到西湖上此日重來意倍親
尊酒暫陪天上使
畫船猶待水邊人題詩香漬箋花舊
度曲聲傳玉樹新

歸醉小樓明月曙開元鐘鼓正朝真

送外兄李學父

鵝鳩涼雨睡偏宜正是敲門下馬時
萬里風塵從戍早十年江海到家遲
書將使節真行錦春上萊衣欲繡絲
且買樓船醉雙玉紅蓮白藕滿西池

送醫士張景遠歸太平之黃池

秋塘雨白水平堤有客撐船繫屋西
司馬賦多方病渴葛洪丹熟尚封泥
滿階花落惟金鳳開戶香來是木犀

昨夜月明天似水
櫓聲不覺過龍谿

劉山驛

開窗坐看千峰頂
對酒還思萬里程
飛雨遠隨松子落
濕雲近向樹頭生
正愁絕
壁鳥鳶背忽聽半空鷄犬聲
安得身騎遼海鶴
徧遊八極醉吹笙

出大橫道中

朝來數騎嶺頭過
忽見青山障白波
候吏報來先擊鼓
販鮮船至盡吹螺
南邊泊久烟塵少
天上恩深雨露多

料得祝釐還報日春風楊柳滿官河

武夷道中

蒼龍飛起崖中斷九曲溪流直上天
駕壑舟船遺故物幔亭簫管會真僊
大王巖上雲初散玉女門前月正圓
醉裏櫂歌聲未已忽看孤鶴下翩翩

贈漳南巡檢許以衷

將軍早獻安邊策手挽強弓起七閩
正為功名輕萬里已知勇略冠千人
風鳴鼓角山村曉日射旌旗海戍春

匹馬何時渡江水笑談為國掃妖氛

懷安縣別莊嘉監憲

荔支食罷龍眼熟此日閩南使者過得俸莫嫌三月少
買舟已覺一時多盟鷗狎舞迎歸櫂別騎驕嘶動佩珂
酒醒青天明月上思君迢遞奈愁何

建寧得宣州家書

江上干戈猶未息此身何處可偷安居民戰死終無援
主將逃生竟被殘已報老妻來太末尚憐孤姪壽長干

扁舟十日閩溪上恨不身生兩羽翰

題樂逸軒

山下長溪溪上村溪山如畫正當門
遣懷詩就題蕉葉理釣船歸繫柳根
問姓不教通郡縣買書只許遺兒孫
相望只是柴桑里何日從君酒一尊

題宋仁甫樂山亭

當陽城外碧嵯峨獨構危亭意若何
嵐氣漸來簷角少水聲偏向石稜多
青雲鶴慣荊州舞白雪人傳郢上歌

何事近來真得趣新松十萬在巖阿

建德城西寺

山門東轉步廊深長日禪房占綠陰松逕雨晴添虎跡
竹潭風冷聽龍吟上林久說相如賦故里徒誇季子金
獨坐胡床看明月不知涼露濕衣襟

蘭溪胡仁中家喜雨

赤日行空勢似焚老龍一起雨翻盆芙蕖趁水紅侵岼
穠稔盈疇綠繞門自是風雲當盛會從知天地有深恩

朝來熟睡南窗醒却憶灤陽從至尊

龍公夜捲天河水散作虛空風雨聲豈獨榮華霑潤澤
要令枯槁遂生成藥欄雙蝶凌晨舞草岼羣蛙徹夜鳴
造化功神竟無迹披衣默默坐前榮

江山縣

萬山深處開孤縣下馬入門風滿庭雨脚遠垂松澗白
雲陰低覆稻田青已知賣劍人歸野還憶彈琴客在亭
安得案區皆卓魯最書時復報虞廷

台州留別林希元

三年直閣常懷士，萬里乘槎許問津。
滄海日華中夜曉，赤城霞氣四時春。
謝公高卧元非隱，陶令歸來豈為貧。
白髮清心自多壽，更從何處覓仙人。

贈天台李鍊師

赤蛟青鳳下晴空，家住天台第幾重。
歲久松脂成琥珀，夜深丹氣出芙蓉。
僊童奏簡騎文虎，太乙縣旗起毒龍。
昨夜從師到天上，故山還著白雲封。

題天台方氏山亭

赤城霞氣燭天起四面窓開碧樹涼
山鳥晝啼深竹裏溪魚晚近落花旁
茯苓酒共僊人飲蛤蜊盤分野老嘗
何日投簪東海去秋風同制芰荷香

過雁山

王事驅馳敢厭勞秋風白髮氣猶豪
八千餘里行正遠四十九盤山更高
石壁連雲愁鳥道海門飛雪壯鯨濤
同遊賴有孫公子時遺新詩浣鬱陶

建寧道中

雙玉山前溪水流，朝來風雨暗灘頭。
舟穿亂石方停棹，驛傍空巖更近樓。
江海十年飛野鶴，乾坤萬里蕩沙鷗。
七閩見說多凋弊，莫為蓴鱸動客愁。

延平

樓閣近依山，上下市橋橫。
接岼東西四時雲氣浮，孤堞萬壑泉流會。
一溪道學已同濂，洛盛劒光猶與斗牛齊。
延平祠下歸來晚，獨對寒燈待曉鷄。

蒜嶺道中

溪雲帖帖雨沈沈頓覺新寒薄暮侵待渡人歸榕葉听
過山驛候荔支林清游暫作還鄉客白髮難忘報國心
莫哄行囊輕似羽一錢元自重千金

泉州驛別太守僕世玉

老夫欲起猶便睡候吏頻催却治行萬里烟雲隨驥足
五更風雨雜鷄聲乾坤笑我應無補江海逢君倍有情
且解金魚沽別酒洛陽橋下正潮平

賦韶州王太守養老園

手種滿園桃李樹東風披拂爛如霞歌催金縷停鳩杖
酒注銀瓶載鹿車白日青春間衛戟碧溪流水護儒家
使君自是吹簫侶不記菖蒲幾度華

漳州

漳南五縣半溪洞狂獠恃險時縱橫巨蛇吞象出當道
猛虎搏人行近城如何百年漸禮化尚爾兩度煩天兵
頑愚無知固可悼承宣亦合思廉平

玉泉為宜春黃子中賦

銀河迸落青天上盡作山中風雨聲溪岼碧桃千歲在
石田瑤草四時生雲流空洞潛蛟舞月湧潺湲睡鶴驚
幾度秋高環珮冷瓊僊吹笛過蓬瀛

風涇舟中

白髮飄蕭寄短篷春深盃酒憶曾同落花洲渚鷗迎雨
芳草池塘燕避風烽火此時連海上音書何日到山中
故人別後遙相望夜夜空隨斗柄東

送汪仲恭往千山

白月團圓星斗稀夜深船去疾如飛
聲傳海角來鴻雁
光湧潮頭出貝璣
歲晚正當還漢節
天寒誰為寄蘇衣
芙蓉絕頂饒天祿
何日相從跨鶴歸

和千山孫元寔韻

霜落梧桐葉上銀
秋來白髮似相親
詩工不讓唐人律
政拙空慚漢吏循
誰謂度遼能下士
自因逢掖學驚人
吳淞江上芙蓉老
還憶南山佩可紉

和潘叔寬所寄詩韻

一笑行藏似賁須誰知白髮事皆殊蒼龍欲化平津劍
老蚌應還合浦珠蔡女書傳猶四百山公學在未全孤
秋來江海非無志奈此兵塵滿道途

風雨吳江秋漸過別來身世轉蹉跎滿階金鳳落將少
傍水樹鷄生尚多且對清尊歌慷慨莫嫌白髮舞婆娑
欲將功業標銅柱誰是當年馬伏波

感春

會稽東望隔兵塵消息傳來總不真
楊柳傍人青眼舊
梅花笑我白頭新一愁風雨三更夢
萬里乾坤二月春
寂寞心期誰會得獨支筇竹立江濱

吳景文居庭牡丹盛開飲後有感

韶光天遣屬君家猶是東京第一花
金鼎夜寒團絳雪
錦機春暖簇紅霞倚風忽作纏頭舞
避日還將便面遮
薄莫闌干同醉倚却憐孤客鬢先華

題朱教授送行詩卷

至正十八年冬余自省府退歸西湖之上郡
博士朱君斗瑞來謁出示京師送行詩一卷
讀之則揭學士巖丞旨吳大宗師王尚書沂
潘司業迪陳監丞旅胡應奉助劉博士聞馮
助教三奇凡九人去今纔二十年皆已凋謝
無存者為之撫卷嘆息因係之詩曰

中朝諸老凋零盡一讀遺詩感慨多
萬里還家猶俎豆十年為客尚干戈
秋風東海雲帆舉春水西湖畫舫過

此去太平應有象杏花深處聽絃歌

用謝元功韻贈劉生庸道還錢唐

綠陰門巷燕遲歸白日看書見客稀
自是病多便野服豈因性僻解朝衣
諸生載酒臨滄海獨子開船背落暉
有約重來莫相遠好將編簡究精微

送方舟上人往靈鷲

靈鷲之山出東海小朶飛來不記年
佛國夜光珠作闕龍宮春冷玉為泉
浮雲不礙遊人履流水還隨釣客船

試問禪師去何處夜來騎虎上西天

巴陵女子韓希孟貞節

尚書子婦魏王孫清白傳家節更文諸將已捐南渡主
孤身猶抗北來軍血書夜灑巴陵月烈氣秋橫鄂渚雲
欲弔忠魂無覓處唯應瑤席從湘君

寄謝丞相康里公

海雲飛盡天如水夜夜遙瞻北斗高正愧無才叨末座
忽聞有命轉東曹鵬搏已借扶搖力鯨背終成轉運勞

白髮儒生何以報唯應執筆從夔皋

送胡孟然還錢唐并柬周伯溫程以文字文子

貞

老夫多家東海上愛子相從又一春官為閒多知性僻
客因住久見情親諫章行曳尚書履漉酒誰同處士巾
此去故人如問訊一槎將泛越江津

送有亨姪還錢唐

嗣宗諸姪仲容賢客路飄零雪滿顛曾為頌椒留子美

却思戲蠟愛僧虔十年江海三杯酒百里溪山一釣船
何日兵戈得休息敬亭春雨共歸田

錢唐壯觀天下奇昔日繁華曾見之夜月管絃唯鼓角
春風羅綺盡旌旗湖山謾想遊人樂城郭徒增志士悲
今日別離東海上一瓢村酒鬢如絲

題劉生庸道竹林書室圖

劉生讀書竹林下滿耳金石聲琅琅翠陰碎落日當戶
緗帙亂翻風滿床中夜蛟龍神變化清時鸞鳳瑞文章

此君標致誰能寫一幅雲烟墨數行

送朱道夫赴廣西巡檢

將軍慷慨出幽燕又佩刀弓過海邊
桂嶺秋回南去雁
潯江夜泊北來船
正憐主印官無事
更喜迎親祿有田
萬里若逢天上使
好將詩句寄蠻牋

題蘆花被圖

秋深江上白蒙茸
野客分來一色同
酒醒孤篷卧明月
帳寒老屋不禁風
羽毛乍聚搏空鶴
蹤跡真成踏雪鴻

夜半何人吹鐵笛夢魂疑在楚江東

次韻李清叔元夕

絳燭燒烟散滿城九衢車馬似潮聲山河影轉琉璃薄
陸海光浮菡萏平蝶睡誤翻歌扇暖鵲驚疑報畫簷晴
夜闌人靜天如水依舊殘星數點明

玩齋集卷四

欽定四庫全書

玩齋集卷五

元 貢師泰 撰

五言絕句

越城馬上

積雨變新綠微風落殘紅
醉騎款段馬日莫越城中

孟浩然畫像

白日何茫茫青春方浩浩
驢背天風來吹我烏紗帽

蘇子瞻畫像

老龍起深夜來聽洞簫聲酒盡客亦醉滿江空月明

無題

隔樓理絲竹切切動人情飲酒且莫散坐待新月生

墨竹

敲枕夢江濤瀟湘生晚綠二妃邈何許千里一黃鵠

右風

雙鳳浴瑤池毛羽空翠滴僊人騎上天但見遼海碧

右雨

蒼龍在海上千載蛻神窟忽然凌空飛鱗甲耀白日

右老

文苞解晴日纖粉落輕颿青鸞忽飛起窓戶自瀟瀟

右嫩

張伯雨丹房偶題

翠禽立紅桃白鶴步青草與子半日間方見靜中好

寶應舟中見月

天風吹帽落忽見月如弦記得開船夜閭門一鏡懸

題海棠鳴禽圖

孤禽立花上似為不平鳴天地無窮意何人解寫生

龍虎山十詠

巨靈劈山石飛出黃金鷄至今山下人猶聽雲中啼

右金鷄山

長溪走蛇蜒怪石露巖巖孰識背上文世無神禹氏

右石龜渡

戴玉出白域獻琛自南溟僊人一叱之化作青峻嶒

右象山

寶劍落深潭時時見光怪鱗甲飛上天白晝風雨快

右龍井

僊子出海上凝冰作肌膚手持青霞佩身坐白玉壺

右藐姑山

天星二十八下作漢廷將功成歸帝傍精彩射石上

右靈臺山

兩龍出行雨下吸幽澗泉噴沫著草樹明珠爛清圓

右雙瀑澗

大道如流泉三才本一氣誰人鑿呂梁留險在天地

右三石洪

鑄鐵在厓石仰視何嵌空明月照不到白雲出其中

右青石巖

濕翠外盤盤寒玉中浩浩不與舅氏同乃有真人號

右白水磔

讀范文正集和黃山谷韻

憂思同禹稷致事期勲華四海無二帝六合當一家
我田宗人田我屋宗人屋百年何所有祠前幾株木
英風凜遺直絕識動樞機既有韓招討當使我公歸
朝議方多異西師猶未班公心如鐵石要在取橫山

七言絕句

龍駒圖

八尺龍駒未被鞍一人牽過萬人看自從夢入將軍筆
青草落花土莫寒

畫松

蒼龍蛻骨東海上太陰黯澹垂高空六丁驅起夜行雨
萬里不斷蓬萊風

明仁殿進講五首

春日君王出殿遲千官簾外立多時觚稜雪轉寒無奈
先許儒臣到講帷

黃綾寫本奏經筵正是虞書第二篇聖主從容聽講罷
許教留在御牀邊

殿前冠佩儼成行
玉碗金瓶進早湯
自愧平生飯藜藿
朝來得食太官羊

黃金為帶玉為褱
劍戟如林衛紫髯
也愛儒臣勤講讀
向前輕揭虎皮簾

奏對歸來日已西
獨騎瘦馬踏春泥
行從海子橋邊過
猶望宮城柳色齊

送人歸廬州

淮水春深綠似苔
故人天上恰歸來
扁舟繫在門前樹

猶記行時手自栽

題淵明小像

烏帽青鞋白鹿裘
山中甲子自春秋
呼童檢點門前柳
莫放飛花過石頭

送陳玉樵著書還江西

相如奏賦宜春館
子雲待詔承明廬
先生有書不蚤獻
白髮如此來公車

去年有詔行馬政
一日買驢三百錢
莫笑江南客徒步

獻書曾到玉除前

湓城雨過枇杷熟綠水新生杜若花
畫船多載采石酒
醉眼看山直到家

和馬伯庸學士擬古宮詞七首

城上鴉啼曙色催五門三殿一時開
玉皇不許群僊見
隱隱車聲天上來

綠池香水出芙蓉十二釵寒妬玉蟲
只恐禁園今夜雨
華清明日又西風

寶扇微開萬樂從
紫衣扶輦出行宮
近臣侍罷櫻桃宴
更遣黃門送兩籠

紫雲扶日上盤盤
花氣薰衣露始乾
行處不禁春色惱
回身却倚玉闌干

睡思厭厭易入眉
繡簾低下燕歸遲
黛鬟不整雙梁睂
滿院楊花夢覺時

殿頭昨夜報春殘
盡放宮人賞牡丹
獨有沈香亭北畔
一枝偏許八姨看

雲影微開日脚垂
杏花深院落遊絲
不知誰動秋千索
驚起黃鸝過別枝

雙鷹圖

青松之下白石上
搜身對立意沈沈
妖狐狡兔莫漫喜
落日一呼烟草深

八月霜風吹羽毛
何人為汝解金條
雙翎如劍劈雲去
宇宙蒼茫秋氣高

雪羽初來東海頭
西風萬里白鵝秋
漢家不校長楊獵

因得將軍脫錦鞬

題出塞圖

君恩如海春如水一入長門見面稀
青草琵琶沙上路
淚痕空濕嫁時衣

沙磧微驚數騎塵
漢廷便欲議和親
當時衛霍兵猶在
未必君王棄妾身

題樵漁圖

長松如蓋復如輪
袒腹支頤倚樹身
誰謂樵夫避辛苦

乾坤許我一閒人

一株烟雨一竿風
江海茫茫望眼空
不是渭陽曾遇獵
世間誰復識漁翁

和胡士恭灤陽納鉢即事韻

紫駝峰掛葡萄酒
白馬髯懸芍藥花
綉帽宮人傳旨出
黃門伴送內臣家

野濶天垂風露多
白翎飛處草如波
髯奴醉起傾渾脫
馬漣香甜奈樂何

蕎麥花深野韭肥
烏桓城下客行稀
健兒掘地得黃鼠
日莫騎羊齊唱歸

新教生駒不受騎
小紅車裏簇歸時
鉤簾醉卧氍毹月
不省人間有別離

野館吹燈夜未央
薄寒偏透越羅裳
出門不記人行路
馬首惟占北斗光

至正十一年秋七月巡按松州虎賁分司時山
谷寒甚公事絕少明日即還為賦此

秋風撼撼衣綿薄夜雨蕭蕭燭焰低
萬里江南才夢覺
此身元自客遼西

雲葉繽紛雪弄花小營近午却排衙
分司御史渾無事
又鞚青驄踏白沙

詠塵

春城花露欲生泥十二街頭漫漫飛
落絮遊絲共無賴
半粘香汗半羅衣

題鮮于墨跡

墨花香潤紫毫圓寫徧湖山忽夢僊十二樓高明月夜
玉笙吹鳳下秋天

題吳宗師看雲樓

四面窓開縹緲間無心飛去又飛還晚來盡捲西郊雨
却伴長松老鶴閒

寶應待邵少監不至舟遂先行

亂帆如馬出高城百里平湖半日程自是南風送南客
何妨同約不同行

朝發采石莫泊儀真舟中望月

萬里滄波一席平
猛風忽變又潮生
今宵共看淮南月
却憶江東昨夜明

赴京留別里中劉李二生

白沙渡口數行酒
采石江頭萬里船
別後相逢定何處
一車行李五門前

發通州

日日思歸未有期
及歸翻恨數年遲
開船聽得吳歌起

絕似閩門送別時

贈呂梁老兵

二十年前福建軍
髭絲垂領眼俱昏
一瓢乞食黃河畔
猶遣兒孫應戶門

舟泊黃河有牧豎
籠稚兔以嬉
因買而釋之
遂作是詩

目睛圓轉褐衣涼
分得山河大地光
今日開籠放生處
桑陰麥穗正茫茫

送王元伯遊金陵并東樊時中都事王德常管

勾

山頭老屋一尺雪江上片帆千里風笑呼斗酒來濯足
誰識書生逆旅中

閉門十日九風雨熟睡不知春水生樹上啼鳥忽驚覺
故人只在石頭城

次成誼叔趙大本二臺都事肅章門聚散詩韻
銀鞍白馬錦障泥立仗時多出駕稀別有天閑真汗血

春秋長從六龍飛

題畫

樓閣叅差烟水村涼風櫺葉下紛紛何人理釣秋江上
驚起新來白鴈群

漁父

一輪明月一絲風吳水西頭楚岫東日日城中賣魚去
却教鷗鷺守孤蓬

灤河曲

椎髻使來交趾國
素馳車宿李陵臺
遙聞徹夜鈴聲過
知進六宮瓜果迴

白沙岡頭齊下馬
為拾閑支八寶鞭
忽見草間長十八
衆人分插帽檐前

水僊

太液池邊雪始乾
曉粧初試佩珊珊
簾鉤欲下東風細
猶夢珠宮扇影寒

十二瑤臺風露寒
銀河澹澹月團團
龍宮自與塵凡隔

別有銖衣白玉冠

畫蘭

西望沅湘不盡流
紅芽綠葉自生愁
王孫去後無消息
風雨山中日日秋

題錢舜舉折枝海棠

玉環睡起嬌無力
膩粉微勻酒暈生
不是開元寫遺恨
世間那得見傾城

題山水圖

孤峰直出青天上，亂瀑斜飛白石間。
老我江湖歸未得，何人解寫敬亭山。

重過丹陽寄錢成夫

高荷矗矗苻田田，數騎來迎野水邊。
只為一春頻往復，縣人識得侍郎船。

青山西去水東流，兩岫飛花送客舟。
何事閭門行一月，不能三日到宣州。

過潁墅廣福寺留題

幾人飲散閭門外落日蒲帆獨自開
偶向龍華寺前泊一株高柳記曾來

龍華寺贈栢庭上人

辛夷花落滿閒庭藥徑斜依翠栢屏
白日山門無客到老僧自誦法華經

姑蘇臺

當時何事太情多不悟危機出芋蘿
一夜月明天似水吳王臺上越王歌

余過吳中得畫一幅孤峰拔起有類鴈蕩僊都
者因題贈宋居仁

鴈蕩秋深玉柱寒老夫曾此駐征鞍開圖一見青山色
猶似當時馬上看

題怪木圖

千年老樹化青牛風雨空山不盡愁一日爭迎作神主
踏歌槌鼓水西頭

秋日與陶唐佐游麻姑萬松庵

萬疊青山一徑開
寺門秋雨長莓苔
莫憐此處行人少
還有僧從外國來

遊里中麻姑西觀三首

道人鈎簾坐堂上
盡日好山相對青
藥苗當戶渾不理
手持一卷黃庭經

樓閣參差烟樹間
石橋橫截水潺潺
我來欲覓燒丹處
蒼術黃精正滿山

石上菖蒲水上蓮
一天涼月露涓涓
碧壇夜半燈如雪

猶自朝真北斗前

題玄妙觀嵇月庭所藏鍾離像

槲葉為衣草為履
鬚髻雙髻任風吹
浮雲捲盡青天濶
正是神光夜出時

題番易劉伯方靜觀齋二首

夜來風雨過前村
百尺深溪到底渾
惟有道人心鏡淨
水流花落不開門

巷陌深深白日長
春來只有燕飛忙
滿階落絮無人掃

銷盡爐中百炷香

野浦歸舟圖

天柱雲門倚半峰
樹林青處見丹楓
扁舟獨釣秋江雪
猶似閒身在越中

書扇勉錢道夫

桑蠶作繭麥生蛾
瓜瓠牽藤綠漸多
白日軒窓淨如水
不妨臨帖更吟哦

西湖竹枝詞四首

柳州寺前湖水平阿誰湖上唱歌聲
畫船買得十樣錦
行近荷花須盡聽

紅裙女兒坐船頭
朝朝莫莫白蘋洲
近來學得新行令
為郎把酒一澆愁

芙蓉葉底雙鴛鴦
飛來飛去在橫塘
人生多少不如意
水遠山長難見郎

葛嶺西邊師相宅
潭潭府第欲連雲
別買樓船過湖去
可曾看見岳王墳

贈錢塘琴士

畫船載酒西湖上一日笙歌幾萬錢
獨抱孤桐向何處夜深彈月上青天

過桐江

雨後滄江一鏡平青山缺處掛漁罾
漢家多少雲臺將千古清風屬子陵

釣臺

嚴陵釣臺詩古今作者甚多或高其隱或議

其果二者皆不為無見予故並存焉觀者應
為一莞也

江流浩蕩石嶺屹千里來尋一日間慚愧白頭奔走客
題詩也到富春山

百戰關河血未乾漢家宗社要重安當時盡著羊裘去
誰向雲臺畫裏看

青山如馬復如龍滄海東來第幾重不是狂奴輕萬乘
世間誰不受牢籠

江山縣道中

石脚插溪清見底白木縛橋斜跨水水流一似橋上人
橋上人行家萬里

興化道中

紫蔗白頭金橘坡荔支龍眼總婆娑驟暄情思如中酒
喜得清陰馬上過

題楊德章監憲賀蘭山圖

太陰為峰雪為瀑萬里西來一方玉使君坐對賀蘭圖

不數江南衆山綠

處州弋溪驛

四面青山風雨多
石稜轉處掛漁蓑
推篷不記來時路
只見雙雙白鳥過

流水一灣山四圍
青林黃葉雨霏霏
竹鷄啼罷人行少
忽有釣船溪上歸

袁莊贈化東庵王道人

夢覺流鶯花外聲
一簾疎雨稱幽情
披衣步向山門立

青草萋萋笋亂生

曲岸西頭屋數椽
綠陰深處好移船
姓名正恐人知道
忽有野僧來近前

吳淞江上謾興

亂蟲撲面蝙蝠飛
木槲飄蕭半掩扉
老僧看潮回寺晚
林下惟逢一犬歸

白月滿天江水平
銀河垂地寂無聲
披衣獨坐過夜半
撥刺跳魚時一鳴

門外梧桐高百尺月華依約弄清陰夜深移在窓紗上不隔思家一寸心

露冷草根鳴蟋蟀雨晴花影轉蠨蛸一家四散知何在獨對林間喜鵲巢

書扇餞徐大章往黃灣

海村四月橘花香日莫牽船出下塘別後莫教音問少
蒼頭時遣送文章

書扇餞潘濟民往黃岡

黃岡只在海東頭野水連天蕩白鷗昨日相逢今日別
藕花深處謾停舟

題朱肅畫

芙蓉零落渚宮秋翠蓋紅衣漫不收猶有雪鴣來上立
夕陽無限遠人愁

書扇餞潘德全往彭坡

潘家兄弟多相識白面書生氣更豪一見便還東海去
健帆如馬入雲高

題劉生庸道五莊草堂圖

南北兩峰相對青
萬竿修竹一茅亭
何時共坐西湖雨
白髮籌燈講六經

題朱生質夫所藏梅花圖

水晶簾幙珊瑚鉤
萬玉花間一鏡秋
睡起瀟湘寒凜烈
却疑飛雪在羅浮

夜深瑤女出寒江
分得南枝雨一窓
可是貞姿共清絕
神僊肌骨更無雙

五言排律

上京大宴和樊時中侍御

一元開大統四海會時髦
畿甸包幽薊天門啓應皋
群黎皆屬望百辟盡勤勞
蕃國來琛獻邊陲絕繹騷
劍韜龍尾匣弓屬虎皮橐
列聖尊皇極元臣異節旄
宗盟存帶礪世胄出英豪
歲駕嚴先蹕居人望左肅
平沙班詐馬別殿燕梭毛
鳳簇珍珠帽龍盤錦繡袍
扇分雲母薄屏晃水晶高
馬湏浮犀碗駝峰落寶刀
暖茵攢芍藥涼

甕酌葡萄舞轉星河影歌騰陸海濤齊聲纔起和頓足
復分曹急管催瑤席繁絃壓紫槽明良真曠遇熙洽喜
重遭化類工成治聲同士赴馨隆恩雖款洽醉舞敢呼
號拜命榮三錫論功恥二桃重華躋舜禹盛業繼夔皋
燕饗存寅畏游畋戒逸遨乾坤春拍拍宇宙樂陶陶爭
獻公車頌光榮勝袞褒

輓馬伯庸中丞

世祖投戈日先公出守初邦人懷禮樂家學贍詩書一

舉登金榜頻年步玉除星移供奉燭風動使臣車忠諫
陳無逸雄文賦子虛群公推雅量多士服清譽太史仍
兼制春官總傳儲槐雲衣纚纚華日佩舒舒長樂方調
膳中臺旋賜輿尊嚴深翠栢清潤照紅蕖德業真無比
恩光孰可如休官唐殿李知止漢廷疏野曠秋呼鴈江
清晚釣魚石田霜後稻沙圃雨中蔬正爾安民望胡為
夢帝居大星離次舍白壁翳邱墟惟有新詩在千年起
歎歎

剪燈聯句

元夕同吳子彥劉子清侯敬文會飲水陽陳

善甫家用剪燈聯句云

夜暖拈香繭春寒落剪刀勞心連鬱結貢綺思出長縑

點綴輕蟬翼

吳

裝粘細鳳毛風花凝瑣碎

貢

雲葉護周

遭影爍金垂燼

侯

光融玉作膏舞裯圍落絮

劉

歌扇逐

飛桃帶轉銀幡小

貢

輪迴寶蓋高蜘蛛圍露網

吳

顧免

墮秋毫鶯擲翻紅雪

侯

魚跳起碧濤春陽噓蛺蝶

劉

秋

冷蛻虬螭翠薄荷分鈿絲柔柳散條青童來降節玉女
翳纖翻碎訝珠胎迸尖愁燕尾翺微茫縈錯落斜隙漏
葡萄飴釜空燒蠟棚山謾結鰲浮塵籠漠漠流水眩滔
滔纂綺難為密裁綃祇自勞嬋娟妬清夜蝶螭落晴皋
製異宮人綬縈懷學士綯未曾分寶炬先許照欄袍劇
賞尊頻倒窮搜筆屢操盍簪嘶騷褭奮袖舞豪曹酒足
華筵散詩漸白戰鏖時平無夜禁繁弱且歸放

玩齋集卷五